

AI FURLANS CHE A CRODIN

# **PUEDIE NASSI UNE GNOVE ZORNADE PE GLESIE?**

GROP DI STUDI "GLESIE LOCÂL"

*Chest document al è stât fat dai partecipants al incuintri dât dongje a Cjampei di Ravasclêt in Cjargne, ai 12 - 13 di setembar di chest 1988.*

*Al presente alc des riflessions, dai discors e dal dibatit cemût che in chei doi dîs a son burîts fûr.*

*Sotoscrit cun libertât, al ven presentât a ducj parcè che si vûl dâ une man in forme pusitive e fâ un toc di strade insieme inte realtât di popul e di glesie che ducj o stin vivint.*

*Grop di Studi Glesie Locâl*

# PUEDIE NASSI UNE GNOVE ZORNADE PE GLESIE?

Incjarnade come Crist inte storie dal om, la glesie a vîf vuê in Friûl un moment une vore dificil ma biel e impuartant. Si cjate di fat intune situazion uniche, là che cul aiût di Diu e podarès fâ une esperience valide e gnove e viergi une strade no dome par sè ma ancje par chês glesiis che, cul passâ dal timp, a podaran cjatâsi in situazions dal gjenar.

Par chest, come grop di predis e di laics de diocesi, o sintin la dibisugne di dâ une nestre valutazion e interpretazion dai fats che o stin vivint parcè che ducj, a pari dirits e dovês, o sin coresponsabii te glesie di Diu.

O pensin, cun chest document, di dâi une man a la int di buine volontât e ai nestris sorestants.

I vescui di fat ju sintin leâts mans e pîts sei dal centralisim di Rome, sei de pôre de opinion publiche, sei soreddut di chel cjiscjel glesiastic che l'autoritât tai secui e à metût sù par dominâ e che ju ten simpri plui presonîrs. Al sucêt cussì ce ch'al è scrit tal salm: "Al sgjave une busone fonde e al plumbe dentri te buse che si à fate" (Sal 7,16).

Par chest, di fradis, o disìn cun scletece ce che o pensin; no crodin di fâur dal mâl, che anzit o sin convints di dâur une man e di fâur dal ben.

## 1. UNE MUSE GNOVE DE GLESIE

O pensin prime di dut, cjalant ai segnâi dai lûcs e dai tims, che al sedi rivât il moment di dâ gnovis rispuestis a gnovis situazions. Si ricuardin de peraule di Crist: "Nissun nol met un toc di tele gnove cree suntun visfît vieri, parcè che chest al finis cul sbregâ il blec dal visfît, e il sbrec al devente inmò plui grant. E nancje no si met vin gnûf in bufulis vieris, senò lis bufulis si sprecin e cussì si strucje il vin e si piert lis bufulis. Ma il vin gnûf si lu met in bufulis gnovis, cussì si conservin ducj i doi" (Mt 9,16-17).

Chest toc di Vanzeli, secont il nestri parê, nol è stât recepît in dut de Sinode diocesane e soreddut dal gnûf plan di distribuzion dal clero, parcè che ducj i doi a dan plui di une volte rispuestis passadis ai problemis di vuê.

O sin convints che une muse di glesie, tignude sù a ducj i coscj de autoritât, e je destinade a sparî. Di fat te mentalitât sane dal popul di Diu no ten plui la religjon de leç, de strutture, dal templi, dal podê, dai partîts, de eficiencie, de paronance sore des personis. E di chest o sin contents.

No si trate di fondâ une altre glesie, ma di riscjâ une leture gnove de glesie di Crist; no si trate di fâ meracui, ma di dâ segns di libertât e passion tal cirî la strade dal Spîr e dal popul.

Une glesie di popul e di Vanzeli, di ultins, di servizi dal mont, là che la umanitât e devente religjon; une glesie cu la muse umane, sclete, libare, divine di Gjesú Crist; no fate sul stamp e a imitazion dai grancj di chest mont, ma alternative, e che, messedantsi cui piçui, e sa cjalâ e tignî cont di ce che il Pari eterni al semene cun bondance ancje vuê.

La strutture glesiastiche e à dibisugne di demitizâ la sô organizazion e di finîle di lavorâ pe autoconservazion di se stesse. E à di superâ la leç che e puarte al pecjât e la pice di jessi a puest cui organigramis e i quadris. Miôr pierdi dut chest, che pierdi il Vanzeli e la int.

## 2. LA DISTRIBUZION DAL CLERO

No rivin a cjatâ daûr dal plan regoladôr diocesan, che al proviôt che un predi al vedi simpri plui paîs, lis coordenadis teologjichis e lis riflessions pastorâls che a àn fat fâ un determinât stamp di sieltis.

Il Vanzeli, il respîet des personis dai predis e de dignitât dai paîs a domandin almancul chest: di rifondâ un mût uman di fâ il predi.

Dopo doi secui de rivoluzion francese, ancje il predi al à di jessi plui respîetât come persone e nol pues sei sacrificât al eficientisim de strutture.

De bande nestre nô si impegnin, cuant che al rivarà il nestri turni, a no acetâ un gnûf paîs dome parcè che a no 'nd è predis, o parcè che si à di ubidî. O cirarìn di valutâ la situazion par rispindi in cussience, e no dome par motîfs organizatîfs, a la domande che nus vignarà fate, rivant, se lu ritignarìn just, fint a la obiezion

di cussience. E chest par judâsi, te responsabilîtât di ducj, a studiâ e cjatâ fûr gnovis stradis.

### **3. LA FONDE DE JUSTE SPIRITUALITÂT DAL PASTÔR**

O crodin che la pastorâl e je, intai nestrîs paîs, un rapuart uman fra il predi che al puarte il misteri de sapience di Diu e la vite intrigade de int.

Il predi al è tal paîs l'om de amicizie umane e de sapience divine.

Par chest o ritignin umiliante, sbaliade e di dam la leç dal cambiament di paîs ogni nûf agns.

La pastorâl no je dome o soledut culture teologjiche, scuele catechistiche e sacraments, ma prime di dut, par un predi o operadôr pastorâl, e je vê l'anim di Crist cu la int.

Par un predi che al è cjavât di Crist, dut al devente secondari: lis leçs, lis sinodis, i ordins e lis oparis, parcè che par lui al vâl vê soledut i amôrs e lis libertâts di fonde di Crist e jessi in sintonie cun Lui e cu la int.

Chest fat, là che Crist e la int a vegnin prime de eficiencia e de istituzion, al è la fonde de juste spiritualitât dal pastôr.

### **4. FIDUCIE TE INT**

Ogni comunitât di paîs e je glesie; ogni comunitât e à dentri di se il Spirt che la anime e che i da, cu la peraule di Diu, i dons e i carismis par jessi popul di Diu e sacrament e segno di salvece te vite di vuê. Par chest:

O volin prin di dut rispjetâ il paîs e la int, cjaminâ insieme, cence meti il paîs ni intes mans dai moviments, ni intes mans dai forescj, ni intes mans dai gnûfs catechiscj che a stan saltant fûr.

No volin fâ pesâ regulis e leçs a ducj i cosej.

O volin meti al centri de nestre atenzion la int, compagnâle cun fiducie, in mût che la gnove muse di glesie che e vignarà fûr cuant che Diu vorà, no sarà chê di une cuintiriforme imponude, ma chê che la int a sint sô: come chês gleseutis che a son propit de int, parcè che fatis cul sudôr e cence contribûts tal dopotaramot.

O domandin che la diocesi a studii pai paîs cence predi soluzion complementârs e alternativis cence copâ di lavôr e di disperazion chei cuatri predis che a restin.

Fâ zirâ un predi par tancj paîs nol rissolf propit nuie e i impedîs a la int di madurâ.

Che la diocesi e valorizi e e judi i predis che a tentin esperiencis gnovis; che e buti vie un telâr che al è par ducj compagn, par viodi câs par câs e in manieris diferentis e diferenziadis ce che al è di fâ.

Soredut che e vedi fiducie inte int e che i consegna la peraule di Diu, la Bibie, e che la peraule di Diu e sedi la fuarce di rinovament de comunitât.

### **5. LA SIELTE PREFERENZIÂL DAI PAÏS PIÇUI**

I paîs piçui a àn di jessi tignûts in palme di man sei pe raccomandazion di Gjesù di meti i ultins par prins, sei pai valôrs che ancjemò a custodissin in se, (in particolâr i rapuarts umans che a son la condizion par une comunitât cristiane), sei parcè che li in particolâr si podaran fâ esperiencis di une gnove pastorâl e di comunitâts cristianis diferentis.

Un plan pastorâl che al partis dai ultins nol pues fâ di mancûl in Friûl di meti in prime linie, par jessi servîts miôr, i piçui paîs.

In Friûl la siele preferenziâl pai puars e je la siele preferenziâl pai piçui paîs.

No voressin che, in non di une logjiche mai metude in dubit, si continui a pensâ che "par furnî l'altâr grant di un domo si puedi sfurnî cualunche altri altâr"; là che i paîs no son altârs ma comunitâts.

O vin tante dibisugne come glesie di metisi su la strade de semplicitât: tai discors, te liturgjie, tai segns, te dutrine, te siele dai responsabii, tai rapuarts cu la int, e chest al pues vignînus soledut di une conversion ai "semplîçs" dal Vanzeli, ai piçui dai paîs.

Che si tegni cont di dut ce che di bon un paîs al à, te fiducie che ogni comunitât e rivi a esprimi i siei responsabii.

### **6. PREDIS GNÛFS - COMUNITÂTS GNOVIS**

In diocesi che ogni plevan al presenti chei che lui al pense che a puedin vê inclinazion e capacitât par fâ il predi. Vuê e je tante int za istruide come scuele, za impegnade come lavôr, za realizade come famee. Cjatâ il

mût di formâju su la dutrine cristiane, alenâju te predicazion e tal contat cu la int, incaricâju, fâju lavorâ, dâur une glesie, metiju insieme par che si cognossin e si vuelin ben... e dopo fâju predis.

Che si finissi cun chê mentalitât là che si confront il predi cuntun determinât stamp di predi: il Spirtu Sant no si è fermât al concili di Elvire (an 300 cirche).

Dongje de formazion dal predi no-sposât, che si scomenci a pensâ ai zovins che a desiderin diventâ predis sposâts.

Dâ responsabilitât in diocesi ai predis che si son sposâts e che a desiderin di tornâ a fâ il predi.

O vivin moments là che ogni ocasion o fruçon butâts vie a son un delit cuintri il Spirtu Sant.

## **LA GLESIE IN FRIÛL E PUES VÊ UN AVIGNÎ**

La storie dal Friûl nus insegne che il popul furlan al à tantis voltis burît fûr lis formis plui adatis, secont i timps e i lûcs, par vivi in maniere responsabile e comunitarie la fede, la sperance e l'amôr che a vegnin dal Vanzeli; baste pensâ a lis Viciniis de Ete di Mieç, a lis Fraternis dal 1600, a lis Istituzions catolichis-sociâls di chest secul.

Ce che une volte al è sucedût, al pues sucedi ancje in avignî se o riscjarin di dâi une gnove muse di glesie al Friûl: la glesie de peraule di Crist, des piçulis comunitâts che a rivin a sflorî in grazie de ricjece di dons e di ministeris, di une liturgjie popolâr locâl.

No plui une glesie clericâl-monarchiche, ma une glesie fate di ministeris.

"Il Spirt al bute amôr" (Gal 5,22) al dîs S. Pauli; e di une altre bande al scrîf: "Là che al è il Spirt dal Signôr e je la libertât" (2 Cor 3,17).

Che il Spirtu Sant nus dei a ducj passion e fiducie, libertât di lâ daûr a Jesù Crist, pussibilitât di dialic tra nô, e la glesie in Friûl e varà un avignî.

Cjampei di Ravasclêt, ai 13 di Setembar dal 1988

20 firmis

*Stampât in propri.*

*Grop di studi Glesie Locâl, Canoniche di S. Jacum, Place Zuan 23 - 33030 Ruvigne/Ragogna (Ud).*

Cheste ristampe e je stade fate in propri de Associazion Glesie Furlane  
pal

**Incuintri di Vençon di domenie ai 11 di Novembar dal 2018  
a 30 agns de prime edizion dal 1988**